

寶前兩溪志畧卷七

歸安吳玉樹靈圃氏編輯

人物一

寶前兩溪間故老相傳宋時有梁夏倪高葛五大族又施氏與倪氏相埒同居射村之西吳明時及國朝初列博士弟子員者尚多前邱馮氏亦稱巨富元末助餉守郡城洪武間有馮璋者以饒貲籍家今射村猶有梁夏浜高家汰地名惜其事蹟竟莫之攷興廢無常古今同慨故述所見聞俾後人知先輩儀型足動觀感誌人物

五代

寶七

一 嘉業堂校刊

高士吳諱頊山陰人因避兵徙湖州射村性恬澹好書

史與吳珙吳崧皮光業林昇羅隱何肅韓必隱于長

興八座山時號入友

西吳里語高士韓必吳崧鍊丹于長興洛塢吳越王錢鏐遣羅

隱招之二人遂隱一石壁今二仙石壁尚存

子諱翦孫諱黨字昌遠孝友

醇謹賑卹鄉里累有隱德後徙嚴州之淳安里人感之築橋以祝東橋曰懷吳西橋曰思吳端拱元年仕建德監倉卒于官子諱漣登宋乾德三年進士六世同居人稱義門

宋

僕射何奩字文績兄棠弟桀竝有文名時號三鳳公登政和五年狀元擢祕書省校書郎遷中書舍人兼侍

講徽宗時或論公與蘇軾黨出知遂寧府已而留爲御史中丞論王黼姦邪專橫十五罪繼上七章及其黨胡松年胡益等俱罷公亦出知秦州欽宗立復以中丞召爲翰林學士進尚書右丞中書侍郎時議割三鎮和金公論辨不已帝頗悟又請建四道總管使統兵入援以胡直孺王襄趙野張叔夜領之兵既應而唐恪耿南仲聶昌堅主和亟檄止之公解政歸俄以資政殿大學士領開封府尹金兵長驅薄城下帝罷恪相拜公尚書右僕射始復三省舊制時康王在河北公建議請以爲元帥密草詔稟上之乃以康王充天下兵馬大元帥陳邁充兵馬元帥宗澤汪伯彥

寶七

二

充副元帥京城失守從幸金營遂留不返既而議立異姓金人曰惟何桌李若水毋得預議公以既陷朝廷仰天大慟不食死年三十九遺詩云人生會有死遺恨滿乾坤建元初訃聞尋得死狀乃贈大學士官

其家七人

案湖錄作井研人徙居寶溪宋史并東林山志作仙井人

尚書倪思字正甫乾道二年進士中博學宏詞科累遷祕書郎尋兼侍講孝宗時諫請諫官同宰執宣引庶得從容論奏上稱善光宗久不過重華宮公疏十上會上召嘉王公言壽皇欲見陛下亦猶陛下之于嘉王也上爲動容時李后預政公進講姜氏會齊侯于濼因奏人主治國必自齊家始家之不能齊者不能

防其漸也始于褻狎終于恣橫漢之呂氏唐之武韋不但魯莊公也上悚然韓侂胄與史彌遠擅權公攻之尤力累官禮部尚書竇謨閣學士生平剛介不苟合自言與爲有瑕執事甯爲無瑕從官卒諡文節生六子祖仁祖義祖禮祖信祖智祖常祖常有最良譽防禦使孟宗政字德夫有膽力開禧二年金將完顏董犯襄郢率義士據險邀擊奪其輜重吳獵奇之金人圍棗陽公午發峴首遲明抵城馳突如神金人駭遁金帥賽不擁步騎復圍公與再興合兵角敵敗之歷三月大小七十餘戰身先士卒隨方力拒再至再北又合許國兵敗金于白水次年金訛可復擁拏子手

寶七

三

圍城隨計設備禦之胄戰凡五十陳殲金兵拏子手十七八奪印十六紐訛可棄帳走獲輜重牛馬萬計軍聲大振遺民來歸籍其壯者號忠順軍出沒唐鄧閒威名震境爲一時名將子璟琪瑛璋

縣志載公隨州人徙居歸安

魯國公孟珙字璞玉勇而有謀歷事寧理兩朝任京湖大使父知襄陽時命公代統忠武軍取閒道劫金營破砦十八斬首千餘級大獲軍器以歸紹定六年元將那顏侏蓋追金主完顏守緒武天錫乘亂聚眾二十萬爲邊患公逼其壘一鼓拔之壯士張子良斬首以獻金人攻呂堰追擊敗之進逼大河金人棄輜重

走獲斬甲士牛馬無算鄧守移刺瑗降盡獻鄧地順陽令季英亦以縣降由州安撫張林以州降連破石穴等砦金將武仙與五六騎奔降其眾七萬獲兵器無算端平元年破蔡金丞相烏古論栲栳降殺金元帥兀林得金鑑寶王金銀璽印牌還上曰卿名將之子忠勤體國破蔡滅金功績昭著詔授都統制賜賚甚厚嘗勑平堰溉田十萬頃使軍民分屯邊儲豐物公忠貫金石軍民愜服指授方畧發兵深入所至以捷聞端平六年初所招鎮北軍駐襄陽李虎王旻亂鎮北亦潰公歎曰三十年收拾中原人今志不克伸矣病遂革九月朔大星隕于境聲如雷越日遂薨特

寶七

四

贈少保三贈太師封魯國公諡忠襄廟曰威愛其學邃于易六十四卦各繫以辭名警心錄號無庵居士

案宋史作魯國公經義考作吉國公誤

高士胡仔字元任家本績溪父舜陟爲廣西帥忤秦檜死公以父蔭授迪功郎轉奉議郎知晉陵縣乞歸自號苕溪漁隱閉戶讀書留心吟詠取古人詩考之傳記作叢話百卷詞林稱其博雅今其遺址俗呼胡家墩云

太守葛勝仲字魯卿丹陽人登進士第歷太常卿續修太常因革禮春宮建以公兼諭德獻仁孝學三論復採春秋戰國以來歷代太子善惡成敗之迹日進數

事詔嘉之徙太常少卿歷顯謨閣待制宣和四年出知湖州六年移鄧州朱勔先求白雀之屬公不與至是媒孽其短罷歸建炎中范宗尹爲相凡前日以朋附罪貶者咸赦還公復知湖州時金人蹂江浙聲搖諸郡劇賊邵青欲道江入湖公修城郭閱士卒作戰艦賊知有備皆引去歲饑斗米踰千錢餓殍相枕公大發倉廩又輸已粟數百斛賑之民賴全活紹興元年丐祠卜居歸安之寶溪紹興十四年卒贈太師諡

文康

案公父書思祖密俱進士子立方孫邨

少保葛邨字楚輔以蔭授上元縣丞隆興癸未舉進士除國子博士輪對論州縣受納及鬻爵之弊孝宗獎

寶七

五

諭除正言首陳征榷歲增之害願明詔有司茶鹽酒稅比原額已增至一倍者毋更立新額上特召復令條陳公以六事對皆切中時病光宗受禪除參知政事勸上專法孝宗上嘉納紹熙四年拜左丞相專守祖宗法度薦進人物博采公論惟恐不聞除少保致仕卒諡文定配饗光宗廟廷

高士賈收字耘老烏程人慷慨好義嗜詩酒喜交遊愛寶溪清遠築別業于溪之陽時人以陶元亮目之東坡守郡時每念之過其居作古木怪石以贈遠近名彥無不蹤其門者從孫安宅字仁居大觀三年狀元年僅二十二歲授校書郎累遷戶部侍郎建炎間爲

給事中封駁無所避歷事三朝累司文柄貢舉得人
徽宗嘗手詔獎諭之子選詳明典故通曉法理官刑
部侍郎

司諫施元之字德初以文學著聲試館職除起居舍人

遷左司諫註東坡詩四十卷子宿

案郡邑志俱作長興人而施氏子孫

相傳世居寶溪以長興籍應試故人長興邑志

提舉施宿字武子克承家學尤留心金石慶元初知餘
姚縣市田置書以教學者邑北瀕海歲役民修堤民
苦之公築石堤建莊田二千畝以供修堤之役民德
之歷任會稽通判朝散大夫提舉淮東常平倉
寓賢富直柔不詳何許人寓居寶溪呈葛魯卿陳叔易

寶七

六

詩云青衫短薄汝陽天鶚牘當時誤薦賢承乏西樞
了無補還依丈席聽韋編洛陳花骨巧裁詩曾把梅
篇薦玉墀來說他年調鼎事只今身已鳳凰池陳君
談論席生風段子文調氣吐虹參木腴腴皆入篋知
人誰過葛仙翁

自註陳名估段名拂

讀其詩可想見其人

元

高士夏文彥字士良號蘭渚博古好學家藏名蹟鮮有
比者鑒賞品藻萬不失一取名畫記圖畫見聞誌畫
繼錄續畫記參以宣和畫譜南渡七朝畫史五代唐
宋以來諸家畫錄及傳記雜說百氏之書搜潛剔祕
網羅無遺自軒轅至元共得一千五百餘人命曰圖

繪寶鑑錄楊維禎序之又創前人所未發立神妙能
三品論畫苑奉爲規範云

提領吳諱康號水村元至正間舉賢良方正任南宮提
領內諧宗族外睦閭黨創修族譜慷慨好義素抱經
濟之學與金華宋濂稱忘形交後宋公應明太祖召
致書薦公而公已歿

吳興郡公孟淳字君復號能靜宋節度使珙孫父之縉
官至尙書公以父廕官至太守贈吳興郡公諡康靖
幼強記號爲奇童喜作詩有衡湖集

明

平涼侯費聚字子英曾祖熙父得興商賈于臨濠至元

寶七

七

末爲盜所劫公扶柩于濠遇明太祖起兵遂從焉與
耿炳文由廣德取長興授永興翼副元帥張士誠遣
潘原明來寇公獨追至鎖苕橋大敗之召回領黃旗
軍李伯昇大舉入寇太祖以長興兵少復命公率廣
德安吉兵應援擊敗之進永興衛指揮同知丙午克
湖州平蘇州改指揮使及平關陝陞都督僉事鎮守
平涼洪武三年封平涼侯歲祿一千五百石予世券
子超戰死璿以人材舉官孫宏累有武功俱徙居五
河茲不詳載

案明史作五河人府志名宦傳作世居
歸安射村祖大均父得興俱以公貴封

平涼
侯

府判孟道夫君復子也博學多才性謙異能寫竹時人

珍之以舉薦任應天府通判有政聲

處士吳謙字宗益號松菊端方嚴重不苟言笑推惠鄉里或忌其能譖諸官舉爲糧解公弗辭正統景泰間屢輸賑饑例授官辭之朝廷嘉其義赦免差役旌表

義民弟宗義

明史孝義傳誤作歸善吳宗益宗義康熙歸安縣志宗益誤作宗孟

承事郎吳諱立字宗義號西疇疎財仗義事親以孝謹稱正統景泰間屢輸粟賑饑授承事郎又出粟二千石白粲六百賑饑例加官辭之同兄宗益乞移榮故父朝廷允之特旌孝義年八十五卒子諱璋克承父志益敦孝義成化間出粟六百石救荒授七品散官又嘗刲股以愈母疾施棺施藥設義冢創義塾修橋

寶七

八

梁道路凡義舉皆力爲之宏治癸丑歲歉復輸金千兩有司以聞特賜璽書旌表父子孝義又散粟四千石于鄉懇陳當道蠲租賦約萬計里人立德惠碑于鹿苑寺張濂記之

太僕吳龍字九淵號西園性剛毅敦名節直諒慷慨官太僕寺主簿遷零陵縣知縣乞養歸增築家廟修輯家譜設義學廣義冢嘉靖三十四年海倭徐海率黨由松犯嘉湖公散金募鄉勇溪港要處多方設備俟倭至輒灑淤泥赤豆於倭舡并岸灘之際倭皆不能上岸暫立又揀壯銳者乘小舟各持强弩奔射出入溪港若飛倭稱爲鐵胡蜂不利而遁德清烏程歸安

皆賴以安後塑像泗水庵

廣文吳應芳字文譽父任光祿丞諱鳳字九韶代有隱德公其冢子也分鐸江陰獎篤行斥浮薄賑貧賻葬卒于官士民哭之失聲奉祀名宦

布政陸綸字理之號南洋嘉靖丙午舉人庚戌進士授刑部郎任四川布政事父至孝于昆仲間尤友愛焉持政寬平去苛法折冤獄署兵事以大義激三軍軍民稱頌不衰謝病歸旦夕課子一介不取每徜徉山水有會心處輒忘返焉卒壽八十有四

濮州守吳應穆字文衡嘉靖舉人授濮州守濮故瀕河賦繁民訐會高唐以浮糧嫁額于濮至驚上聽幾聚揭竿公力陳之當事遂仍故額民賴以甦民有谷姓者妾夜爲人刃他讞者坐其罪谷之傭傳某獄已成公得真盜脫傳于幽室泣任晷月威惠畢殫兄應和字文節號道南強直不屈篤學善文

靈壁令吳仕讓字允恭性倜儻善詩文書法虞楮自號三吳墨卿嘉靖戊午舉人授靈壁令先是邑大水嚙城下民徙鄰壤者十室而九公至卽白上司蠲賦親自弔慰民遂返壬午復患水如初公周視地宜疏渠原野邑賴以安

郡丞吳仕昂號馨葵有蛇百餘見于室而誕公萬厯辛卯舉人選邵陽令尋陞寶慶郡丞署郡篆一年訟者

無留獄時有隆回洞蠻出市殺人遠近騷動公單騎
往諭蠻泣感納款旋以忤璫乞歸壽七十四舉鄉賢
大賓

莆田令嚴廷儀字景荅父汝麟嘉靖戊午進士任榮府
長史公萬厯壬辰進士任莆田令孝友克敦經濟夙
著妻陸氏布政南洋公女也性貞靜不苟言笑善詩
文翁姑妯娌嘗誣其短氏仍孝敬如故人咸敬之後
爲妯娌所害公適省親歸里亦死于家難

高士吳夢暘字允兆號北海強直不避權貴工詩古文
雄長詞壇兄弟五人公居最幼有誣叔兄殺人者辭
連諸仲郡丞下令捕急將收其孥公挺身見丞辨誣

寶七

十

狀得釋遊長安與宋忠甫張聖標李如松交時如松
督兵朝鮮聘公爲參謀復所侵地倭遁去于是海內
賢豪爭交于公時人以公孝友類姜肱義類魯連詩

類高岑言論風旨類林宗云

明史文苑茅坤
傳誤作夢陽

鄉賢吳世裕字伯順號冲陽父贈中大夫諱仕謨號豐
原救濟戚里不責報者幾千計公一承父志敦本尙
義萬厯戊申己酉閒出粟首倡賑饑築城墉建水柵
繕祖塋掩骼埋胔恆殫力圖之壽百歲子時亮

六安守吳世濟字楫侯萬厯壬子舉人任太和縣令時
流寇猖獗公築城浚池鄉城聲援親冒矢石殺賊首
紫金梁眾宵遁城賴以全 國朝乾隆庚辰崇祀太

和名宦

少司馬吳時亮字元亮號訥如晚號止庵萬厯進士天啟閒督學山西時中外頌璫功德建祠太原守及諸縣令效之公曰媚璫以保富貴如物議何守正得禍未始非福璫祠遂已崇正閒敕整飭江海一帶兵民勦捕倭寇海盜節制巡撫操江等官督運軍餉歷任廣東布政司使陞南京兵部侍郎以親老致政拓宗祠修宗譜族人仰之壽九十七

高士吳磐字大雍號桐江才抱經濟學貫百家與張天如楊維斗韓求仲倪鴻寶黃石齋凌苕柯諸名士交好庚辰歲饑公策救荒十二議上之軍民全活無算

寶七

十一

流寇分掠山邑郡守聘公爲籌畫崇正閒以經濟召再徵不赴著作數十種兼工行草書得之珍如珙璧秀才吳子方父世濟公兄弟五人兄子向棄儒就墨弟子易早卒各遺孤寡無所依公與同居篤愛無異已生宗黨稱之